


OVE WAFWELELA ECHI?

 Kaha shimbu kanda etu tulombe, Ngunatondo kuhanjika echi, chingoloshi chinahichi, Ngwachifwelelanga, Ngwahanjikanga kuli pwevo umwe, “Kachi enu namuya kaha nakulinga nge omu vathu tetekelele kulinga, nge nachiya... kemba na mutwe wameya, kuya nakukonyachila.” Kaha mutwe wa kemba kukonyachila, ufuku unahichi, chimbwa chakupima na lungoji. Shikaho uze pwevo achinehele hano jino.

² Jino, mulonga Ngwalinganga ngachize, ndumbu wapwevo, kuli pungu. Talenu? Kachi enu munahase kumona chumachimwe chakutamo kusoloka, chize nachiya nakulingisa lufwelelo lwenu kuzunduka nakutwalilaho kufwelela. Lwolalumwe Nangulinga kaha echi mangana, nge kuhula uze muthu kwiza helu, nakwiza nakumbata tambo mokomoko jivali, tambukisa livoko lyove, nyengesa munwe wove, kupwa kaha nachuma chimwe chize vakiko vanahase kulihandununa, kuvalingisa vakiko kumona nge echi chili chosena chakwoloka. Vakiko kupwa kaha wakulizakamina na kushinganyeka kacheshi nakuya nakusoloka, oloze chili nakusoloka lwola lwosena. Talenu? Echi chatela kupwa.

³ Vangahi vanatondo kuanuka mukulomba, jino? Enu zundululenu mavoko enu kaha na kuhanjika, “Mwata, tuhane echi”? Echa tunongamenu mitwe yetu.

⁴ Mwata, nge omu etu tulinakwivwa echi ol’ mwaso wa liuka, wakusoneka kuli sepa wamwaza, Paul Rader, “Fwelela Kaha,” etu tulinakushinganyeka jino uze kanyike walunga, vamunehele kuli ise kuli tumbaji, kuhambakana makumbi teni hanyima ya Yesu kuvahana vakiko ngolo ja kutapula vandemone na kuka vakakuviza, kaha hano vakiko vapwile vene vakuhonowesa kuukalu wakatunya. Kaha vakiko vamwene Mwata wetu kwiza. Kaha tata kulaha na kuhanjika ngwenyi, “Mwata, nguwile keke. Mwanami vanamuyanjisa chikuma kuli liyavolo. Ngunamunehe kuli tumbaji Twovo kaha vakiko vanahono kumuka ikiye.”

⁵ Yesu ambile ngwenyi, “Ngunahase, kachi ove mufwelela. Fwelela kaha.” Ove Kalunga, Ove kawalumukileko chipwe chindende kufuma haze: Ove uli kaha youmwe wazangi, unyema, kaha Kalunga wakatetela. Nge omu Ove wapwile vene, shikaho Ove mukiko uli na lelo. Kaha Mwata, nge tata, etu natuya vosena nakutambakana, “Mwata, kafwa Ove kuzeneka kufwelela chami.” Echi chili chuma chachashi; etu tuli kaha nakuhukana hali echi, Tata.

⁶ Etu twatondo tukuhane Ove kusakwilila na kwalisa ha kukwata hali uze kemba wamundende ufuku unahichi, kumona

chize chize chikola, chize chapwanga chakujimba, echi chili, chize chinapu chifuwa chafumanga, chalovokele chimbwa cha inch ufuku unahichi. Etu tuli vakusakwilila hali chize. Tata, Omwo etu tunatachikiza nge va ndotolo jetu kaveshi nachumako mukutonda hali chize, kakweshi nachumako vakiko vanahase hali chize; oloze Ove hanga wapwa Kalunga, Mukulwane wamaukalu osena. Etu twasakwilila Ove, Tata. Etu twakusakwilila Ove hali ou mama wakulihana, kaha kuyemanyina, na kwononoka chakuneha cheka elu lungoji na kusoneka echi hachihanda cha lipapilo, hano, kulwekesa likungumbuwa ha unjiho ha upahu wa Kalunga. Echa venyi vavandende kuyoya na kupwa mwana wakulikangula, ha upahu Wove.

⁷ Tala hali aze mavoko osena anazunduka helu, Tata. Vaze vosena vanatondeka. Lyami helu, nawa, Tata, Ngunatondeka. Kaha hano vavavulu hano, mu chifwanyisa cha lusona mokomoko muli echi chimbokishi, vanatondeka, vathu vali vene nakutondeka. Echa echi chize nakuhita, Mwata, nge wosena atambule kutonda chavo ufukuuno. Echa vakiko vambate unjiho wayou mama kupwa chitalilo kusolwesa nge omwo Ove kuhanjika kalachuma, echi chinakumu. Echi chili...Ove... Vyosena etu tulinawo kulinga mangana kutambula echi na kuzata hali echi. Ou unapu mulimo wakukumisa.

⁸ Tuhane, Mwata, nge umwe osena jisona na malesu, vathu vaze vakiko vanasavala hali, echa vakiko vapwenga vakuhinduka. Vosena vaze vazundulanga mavoko avo, Tata, vakiko echa vatambule kufwila cha michima yovo. Etu twalombo echi, mu Lijina Iya Yesu. Amena. Enu mwahase kutwama.

⁹ Ngwatondanga kaha kumilwekasa enu elu lungoji hano, uze pwevo wakalemesa (Yenu haze jino. Huuhum)...uze mutwe wauze kanyike wakemba kukonyachila nge omu Mwata ashikile kuhichila muli Shipilitu Wajila ufuku unahichi. Kumana Ikiye keshi wamwazako? Shikaho, tuhane etu chikuma kumika mangana tupwenga na lufwelelo na kufwelela.

¹⁰ Jino, omwo Yesu ahanjikile kuli uze mutondo, mu Mako 11:23, "Kakweshi muthu umwe mwakalya kufuma kuli ove," Ikiye pamo katambakanyineko. Mwomwoika, hatomato, Ikiye apwilenga wamwashi hali chize, palanga tumbaji Twenyi kaha...Ngwashingtonyeka umwe wavo amwivwile Ikiye. Kaha echi...Omwo chize kutunya, omwo chejile kumeso a Mwata Yesu, uze kanyike walunga atunyine chikuma kuhambakana omwo apwilenga; pamo, kuholoka na hamavu nge wakufwa, oloze ikiye atachikijile nge naliwane naMuthuumwe Uze apwile na lufwelelo kuhambakana vaze vapositolo.

¹¹ Jino, Ngunatondo muthuumwe nge kafwelela mu kuka cha Ukalunga kutala hali echi. Yesu avahanyine ngolo ja kutapula

vandemone, kaha vakiko vahonene. Keshi nge ngolo jahonene, oloze vakiko vahonene. Yesu avawekele vakiko:

“Mwomwoika etu twamuhonena kumutapula?”

Ikiye ambile ngwany, “Mwomwo kuzeneka kufwelela chenu.”

¹² Eli liuka hanga likwechi ngolo. Kalunga kanda lyehi afumise ngolo Jenyi kujifumisa muliuka, oloze liuka kalyeshi nalufwelelo lwakutamo lwakuzata hali echi. Mukiko kaha. Chili kaha chachashi. Etu tuli nakweseka kulichilingisa kupwa chachikalu lwolalumwe, oloze nge namuchilingisa Mujimbu wamwaza kupwa wawashi, mukiko enu namuya nakupwa nacho, omwo enu namupwa wamwashi na chize: Kalunga ambile ngocho; mukiko kaha nachipwa; mukiko kaha. Kaha fweleleni echi, yenu lika kulutwe.

¹³ Omwo Yesu ambile ngwenyi, “Kakweshi naumwe pimbi mwakalya kuli ove,” mwomwoika, mafwo apwile hanga amwaza na kusoloka kana nge apwilenga. Vize viyau vyasolokele mwomumwe, oloze kwishi kumavu kumiji, chize kuyoya chaputukile kuzuza nakufuma.

¹⁴ Shikaho na kansa, hali kala muyachi wa musongo uze— uze enu mutondo kushinganyekaho. Omwo enu namwitavila Lizu lya Kalunga, kufuma kwishi ya miji, ize kansa yinahase kupwamo; livoko lyove lihahase hanga lyapwila njija. Chize kacheshi nachuma chakulinga na kuka cha Ukalunga. Echi chili, “Kachi ove mufwelela.” Talenu? Mujila kwishi kumwe, chinazachiwa lyehi.

¹⁵ Yesu ambile ngwenyi, “Kachi enu namuhanji kuli eyi pili, “Tutuluka,” kaha kukakasana mumuchima wove chiku, oloze mufwelela nge vize wahanjikanga naviza nakusoloka, nauya nakupwa na vize wahanjikanga.” Echi kumana kacheshi chamwazako? Chize nachifuma kulihya? Uze Mwana Kalunga, Uze ukwechi Mazu. . . Melu na mavu nawakaya nakuhita, olozejino. . . oloze Mazu Eyi kaweshiko.

¹⁶ Jino, jila kaha enu munahase kulinga, enu mwatela kupwa na kujina chakwoloka na punga yakwoloka. Jino, kachi Ngwalovokele hano na kuhanjika, “Nanguya nakumulwekesa enu Ngunahase kututula eyi pili, “Tutuluka, pili.” Ize kayeshi kuhasa kutambukako. Punduvene chika. Chipwethuhu chuma Ngwapwanga nacho. Echi chatela kupwa. . . Chatete enu mwatela kuwana muchima wa Kalunga.

¹⁷ Ou ukiko mulonga, kakavulu mumukana wakulombelela, Ngwa—Ngwawanyine chuma chachindende, echi chili mwomwo chumachimwe chize chayile nakuhita mumukana na kuhanjika ngocho, kaha haze hakiko enu mweji kukindulukanga kunyima. Oloze talenu, kachi enu mukwechi shili jakuhona kulikonekela. . . Enu mwamona lyehi hali uze ukalu, shimbu kanda Ngwalwekele uze shipilitu wamupi kuya? Ngwatalile

hali uze mulonga punduvene kupwa wakukunyuka nge chuma chimwe muli chize kuyoya nge nachiya nakuhonesa chumachimwe, talenu, mwomwo anukenu, hali awa mawana, ove unahase kwingila muukalu na vakiko.

¹⁸ Kalunga, ove enuka lwola lumwe, kuhana kapolofweto. . . atengele kapolofweto kufuma muli muthu, Mose, kaha amulwekele kuya, nakuhanjika ku lilolwa. Kaha uze kapolofweto apwile wakuwahilila, kaha ayile, nakuveta kulilolwa, kuhanjika ha kuzeya cha Kulishitu, nge Ikiye atela kufwa lwola lwamuchivali mokomoko kupwa vakuvetuwa lwola lwamuchivali. Ikiye apwile na ngolo chakuneha echi, oloze kawapwile muchima wa Kalunga.

¹⁹ Kangwahashile kufwelela nge wapwilenga muchima wa Kalunga wa Elisha kuya nakujinguluka, mwomwo vana vapwilenga nakutoleka ikiye ha mutwe walyanja, Ngunahono kushinganyeka nge ikiye atelele kulinga ngachize. Oloze ikiye apwile kapolofweto, kaha apwile wakupihilila, kaha ikiye ahakile changu hali vaze vana kaha milusu vavali vavihwevo vajihile vana vavandende vakuzeneka mulonga fwote tu. Talenu? Oloze Ngwahono kufwelela ikiye atelele kulinga ngachize. Kaha chili kaha—chili. . . etu. . .

²⁰ Kalunga, Ngwafwelela lelo, shimbu Ikiye kuhaka liuka Lyenyi mu ngolo, Ikiye kweseka liuka Lyenyi kumona chuma muka nachiya nakulingika.

²¹ Etu. . . lwola nalwizaho, pamo, kachi Mwata netavila omwo Nangukakinduluka, natuya nakupwa nalwola lwakutwamomo ha chumachimwe nge ngachize, ha chumachimwe chize chilinakusoloka, kahajino etu natuya nakutachikiza chikuma hali chize jino.

²² Oloze kachi ove muya kaha nakuhanjika lizu, kuhanjika, “Mwata, Ngwafwelela echi,” kanda kukakasanako, chilumbunune mumuchima wove. . .

²³ Jino, kuhanjika chakutalilaho, Ngwapwile mu chinekaneka, kaha Kangwa. . . Nguli nakunangula ku jimiliyoni ja vathu, oloze kusali kaha ya pili kuze, kuli lizavu lya vathu wani handulendi, kaha vakiko vali nakufwa chakuzeneka kutachikiza Kulishitu. Chamwaza, Ngukwechi miliyoni hano ngwatela kunangulako, oloze, Chumachimwe mumuchima kungulweka yami, “Yako hali avathu. Yako kuli vakiko. Vakiko valinakunonga.” Ngwatondele kuya amilyaveneko, oloze muli Chumachimwe muli yami. Talenu, uze napunga Kalunga jino. Talenu kujina kana, talenu omu ili punga ili nakuya, keshi ya iveneko. . . Jino, kachi Nanguhanjika, “Chamwaza. . .” Kachi kujina chili chakwoloka kuze, oloze jino Nguneza hano kaha hano ha pili yayinene, Ngunahanjika, “Munatachikiza, kachi Nangukanduka haze ha pili na kulwila vosena vaze handulendi ya vathu, likumbi limwe vakiko navaya nakupwa chifwanyisa

kuze: Ndumbu walunga Branham, uze kamishonali wamunene.” Jino, kufwila chami kacheshi chakwolakako. Ize pili kayeshi kuhasa kuholakako. Nduma, mwane.

²⁴ Oloze omu punga na kujina chili chakwoloka, kaha Kalunga mukachi ka muchima ami ali nakungutwaminanyina, kaha Kangweshi kuhasa kuya kuze kupiliko, kujinguluka jize pili, mwishi ya pili, Nanguya nakuhanjika, “Pili, tutuluka.” Pamo echi... Omwo Nanguhanjika ngachize, kaha kakweshi Kuhanjika echi na muyachi wa shipilitu wakwoloka, vakutwaminanyina na Shipilitu Wajila, mu punga ya Kalunga, kuze pamo kunahase numba kuzala cha nguto yato yakuulumuka chakufuma kuze kupili, oloze oloze ili mujila yacho. Likumbi likwavo kunahase pamo kuholoka jipaundi jivali. Likumbi likwavo chimbwa cha ton. Kaha pamo mukakweji, faifi ton kuholoka. Chuma muka echi? Pamo kaweshi numba kuhasa kumonako, oloze ikiye alinakutambuka, hajila yacho. Nanguya nakutwama hazevene na kutala chuma nge chatela kulingika, mwomwo Kalunga ambile ngwenyi shikaho mwaya nakuchilinga.

²⁵ Munahase kushinganyeka nge mama yove kuze ufukuuno? Chosena chakwoloka, kachi ove muya nakushinganyeka echi, ikiye mwaya nakupwa kanawa. Chosena chakwoloka. Chize chinapu kachi ove mufwelela: hanjika kaha lizu na kutwama na chize. Talenu? Fwelela kaha; kwachilila kuli chize. Chinapu Kuyoya cha Hayamyaka.

²⁶ Jino, hamene namusana... Ngunalweke Billy, ufukuuno, afumiseko makati akulombelela, kaha Ngwatondo kuhanjika. Nguli nakwitavila, mumuchano, Ngunapunga nakuya kufuma mu Chizeji, kusali yatulungalwiji, na kukinduluka, mu Phoenix, kwimbo, nakukinduluka, kaha ngwazeye mwosena (chize kutumbununa vishingayeka) palanga nomu Ngwazeye Ngunahono kutachikiza noho Ngunemana lwola lumwe. Echi chili kaha nge vananguvete.

²⁷ Kaha jino, Ngwatela kuseza, kaha vakiko... enu—enu vandumbwami mwangusanyikanga mangana kutwama kuze makumbi amwe. Omu Ngwasakwilila chize. Nguli vene nakushinganyeka nge eli linapu lizavu lya mwaza lya vakakuzata hano. Kushinganyeka kachi ngwapwanga na lwola lukwavo lwalundende lwakupwa mukulikata. Kachi Mwata netavila, Nanguya nakukinduluka lwolalumwe. Kakweshi chuma chekako, kachi kufuma muliuka nakuya kulikwavo na kujinguluka nakuhita mumbongi na kumenekela enu vosena. Nanguya nakupwa wakuwahilila hali chize: kalachuma chize Nangulinga nakukafwa Wangana wa Kalunga, chize chili, kachi enu namutondo yami kulinga chize. Kaha kukinduluka lwolalumwe na kulinunga na etu nakupwa na, kuliwana chamwaza kumwe.

²⁸ Kaha anuka, vandumbwami, Nangupwa nakumilebelela. Chize chinapu chumachimwe vene. Kaha Ngwatondo enu vosena kungulombelela yami, enu vosena.

²⁹ Kaha jino Nguli—Yami...Hamene na chimene chinapu kutanga kuliuka mumauka akuhandunuka handunuka kujinguluka muno mumbongi.

³⁰ Jino, mazavu amwe kufuma mu Jeffersville vali hano. Vamwe masepa jami, umwe hali vaze vakufwelela muliuka, vali hano, Ndumbu walunga Fred Sothmann. Ngunapu wakutela kumona ikiye mukuliwana. Kaha ndumbu walunga... Mamalelo, vavavulu veka masepa jami kufuma kuze ku Jeffersonville, yami uz-...wami kalaliki kuze na—na vosena hano, kumwe mu kuliwana. Kangweshi kumona vakiko chekako.

³¹ Kaha vandumbwami, kuli amwe mauka amwaza hano muli ino mbongi. Kaha enu vosena munapu vangeji, kuwana limwe muli akiko kaha kuya kuli aze mauka hamene. Vakiko navaya nakumilinga mwamwaza, Ngunakunyuka. Vakiko vanapu vandumbwami vaze vafwelela muli ou muyachi wa mulimo. Ou ukiko mulonga vakiko hano vanatwame hakamenga na muvihela vimwe hano, mwomwo vakiko kufwelela muli echi. Kaha Ngwasakwilila vaze vathu.

³² Mwata, kisula va Full Gospel Bussinessmen vali hano vaze—vaze vambwembwa va chino kuliwana. Kuze kuli...Ngwafwelela nge chize chapwile chakwoloka, vaze vambwembwa wa chino kuliwana. Ngu—Ngukwechi vambwembwa vavavulu, mwomwo muze...Etu twatela kupwa mujila kana, oloze lwola lwaluvulu, vandumbwami echa chihandwa chachindende: nge muthu mwafwelela chindende *chumachimwe*; mukwavo, *chumachimwe* chindende; echi chinapu chuma chimwe chakuneha mifwilijiji na jimbandu jamwaka kunyima okwo; yatela kupwa yakukiwa hali luno lwola, oloze echi—echi...Kaha kachi enu, mokomoko, kachi Nangumbata va Full Gospel Businessmen, jino kukafwa chamuyachi kukashiwa, kaha etu kupwa hamwe, kaha etu tukwechi kulikata chivene, kupwa kaha nalwola lwamwaza. Kaha etu twasakwilila chize. Kalunga kisula uze kapetulu. Ngwafwelela nge Mwata amukatwile chili napunga.

³³ Jino...kaha jino Ngwapwanga na chihela chalisesa cha kumona chihela cha Ndumbu walunga Oral Roberts likumbi likwavo. Kaha yami, chihela kana chamali, chihela kana kuwaha. Echi chili—echi chili chakwanukilaho kuli va Pendekosita.

³⁴ Kahajino Ngwayile kuze kuli Ndumbu walunga Tommy Osborn, chihela chikwavo chamwaza, muthu wa Kalunga wamwaza, hiya...Ndumbu walunga Tommy na Yami twapwa hakamwihi, na Ndumbu walunga Oral, nawa, kupwa kaha

vandumbwami vamaunga, kaha twalizanga umwe namukwavo, kaha kweseka mwetu mwosena kuzata vyuma vyosena nge etu tuhase kulingila vathu vamwaza mu Wangana wa Kalunga.

³⁵ Shikaho Ngunasakwilila vene vaze malunga kupwa hano muli ino mbongi mukachi kavosena vaze malunga vambwende enu mukwechi. Enu mikoko mukwechi tufunga vamwaza. Nguli kaha, Nanguya nakuhanjika nge ngachize. Echa Mwata atwalileho kupwa na enu vosena chikiko kulomba chami. Kaha jino hamane namusana, Nguli. . .Lwola muka yeji kuputunga kutanga, vandumbwami? Twende seti. Echa kuhanjika wani—wani mokomoko wani seti enu mwatela kupwa hano shikaho vakiko kaveshi kuhasa kuhonesa echi kutangisako.

³⁶ Jino, kachi vanyike vamaunga kavamilwekele enu, ufukuuno vakiko vapwile na mikanda yimwe, vifwanyisa na vyangocho, na jitepu, na vyakukopa, na. . .kuliwana, kaha vakiko kuyilanjisa. Oloze etu katweshi kuvechela vakiko kulajisa ha Sambata ko, hamene. Mikanda yauchi mokomoko kwauchi vatela kulanjisa. Shikaho etu katweshi. . . etu kavatwitavilile chize. Chipwethuhu vavavulu vahanjikile ngwavo, “Ove unahenga. . .”

³⁷ Kaha Tata wakashinakaji Bosworth apwilenga nakungulweka yami, “Mamalelo, Ndumbu walunga Branham, ove unahenge haze,” oloze ize ikiko jila Ngwevwile (Talenu?), kaha Ngwa—Ngwawwile. Kachi enu mwatondo umwe, vakiko navamihana umwe, oloze kachi enu. . .Oloze etu katweshi kulanjisako ha—ha Sambata. Nduma. Mukiko kaha. Kachi Ngwafwelela chize, Ngwatela kuyoya chize, kupwa kaha. . . Ngukwechi kuyoyana yami lyavene. Mwamono? Kaha Ngu—Ngukwechi kuyoya na kukunyuka na vyangocho. . .Mokomoko enu namutuma kwimbo, na, kuze kuze, kuze kuchihela na kumbata.

³⁸ Jino ufukuuno, mamalelo, echa kaha tuvulyame chize, mamalelo, nge kuze kuli kala mulimo watela kulingika, mokomoko kalachuma nawa, mokomoko kuyanda cha likumbi. Echa tutulike kusali vyuma vyosena, kaha kutala mu Lizu mumunyutu yayindende, kaha talenu chuma Kalunga mwaya nakuhanjika kuli etu kuhichila mu Lizu Lyenyi. Kaha echa Ngulombe nge Kalunga mwaya nakuhana etu kisu yayinene chikuma ufukuuno.

³⁹ Gene, unahase kungukwachilayo yami? Unahase kungukwachila uze kanyike wapwevo? Keshi kanyike wamwazako? Unatondo nge unyenga kwimbona yami na kuhema na wamundende Sala, kupwa *elu* ngana? Mamalelo, enu namuhasa? Nguna—Ngunatondo enu. Ikiye kupwa kaha nge seteko yove, kaha ikiye apwa kanyike wapwevo wa Tata. Uhuu. Huu. Kaha Ngwalivwasano enu—enu wazanga Tata nawa, keshi ngochoko? Mama? Mamalelo, pundu ove weji kulinganga.

Kanyike wapwevo wamwaza, Ngunatwame hano, kutala hali chize. Meso amandende kusoloka nge mena avalali akuwema mulipayi kaha—kaha jikambu jisweha.

⁴⁰ Ngwazanga kaha vana vavandende. Ngukwechi vanyike vwapwevo vavandende vavali kwimbo. Umwe wavo ikiye Rebekah kaha umwe mukwavo Sala.

⁴¹ Hano lwola lumwe kunyima okwo, Ngwapwile kweka. Vakiko vali vosena vanyike vwapwevo va Tata, munatachikiza, kaha Ngwavazanga. Kaha kachi Nanguheta nakwingila Ngwatela kuvambata kunyima na havifwiji, kaha . . . kaha Becky ikiye ali wamunene; ikiye ali wamunene nge Yami. Ikiye mwaya nakuhokola nyima yami jino; ikiye . . . oloze hanga kanyike wapwevo wa Tata, mwosena omwo. Kaha jino, mu mwaka ukwavo, etu twatondo kumutwala ku shikola ya Mbimbiliya kumwe kaha kufuma kushikola ya likungumbuwa.

⁴² Kaha jino, vakiko vapwilenga nakuvandamina Tata, munatachikiza, kwiza kwimbo. Nanguya nakupwa kumwe kukuliwana. Kaha hamene na ufuku vakiko navaya nakuvandamina palanga mukachi kaufuku kweseka kwingila. Kaha shikaho, Nanguhinduka chimene muchimene, pamoseli mokomoko fwo koloko. Kaha mama omu mweza kuchikolo nakungusokolwela, kaha Ngwapwile ngunazeye kaha kuzeya, Nguli . . . Hano hakamenga, Ngwa . . . omwo va . . . vakuwavisa kwivwa kana, oloze omwo kachi navakuseza, muze mukiko ove nawingila muukalu. Vangahi vatachikiza chize? Mwomwoika, mukiko vene.

⁴³ Tala. Eliya ayile hapili nakusanyika kakahya kufuma mwilu, kusanyika vula kufuma mwilu, kaha jino omwo Shipilitu yamusele ikiye, ikiye akimbwojokele muze mupambo mu makumbi fwote kaha Kalunga kumuwana ikiye, kumukoka muwina kumwe.

⁴⁴ Yona, ikiye ayile ashikumukile nakupwa wakuyoya mujimo lya ishi mumakumbi atatu na ufuku, vamusajilile kungenge kaha ayile nakujinguluka nakunangula. Mbongi yosena kulikonekela na kwiza kuli Kalunga. Kaha omwo chize kuwavisa chamusele, ikiye ayile helu lya pili na kulomba Kalunga ambate kuyoya chenyi. Talenu?

⁴⁵ Ngwemanyine kusali ya chimbumbwe cha William Cowper, keshi kushimbula chikumako, uze asonekele uze mwaso wapuho uze etu twazachishile ha kutanga chetu cha communism:

Kuli Kaselwoke wakuzala na Manyinga,
Wakufuma kumishisa ya Emanuwele,
Kuze mukashili eji kwingilanga mulivaji . . .

⁴⁶ Mwevwa lyehi chuma muka ikiye . . . kusoloka kuli ikiye? Hanyima ya kumuseza chize kuhwimina, ikiye sekele kuwana kalwiji wa kulisukikila.

47 Ngwayoyo kanawa kuzauka kufuma ku Limbo Lyamwaka lya ku Kentucky. Kaha Stephen Foster ahanyine America myaso yapuho. Kaha omwo ikiye asonekele, apwile nakumuhizumwisa, chize kuhizumuka, kusoneka, mwaso, kahajino omwo ikiye ejile nakulovoka kufuma muli chize, ikiye nakumbata meya akunwa. Makumishilo, kusanyika ngamba na kumbata yembe nakulisukika.

48 Vathu vanahono kutachikiza nge vayoya muli ize ngalila ya shipilitu nakuhita. Jino *hano*, ove uli nakwivwa nge ove unahase kututula pili. Oloze echa kaha kuwavisa chiholoke muli enu, kaha kuputuka kuhita muli chize chikolo (kachi mthuumwe kakweshi kukwata ove, talenu) kahajino, pamo mujiola jajindende, enu kamwawashiko, kuikomokela ove ulihali. Kaha jino ufuku na naufuku, kupwa nakweseka mwosena.

49 Kaha vavandende...Kutonda kumilweka enu hali wamundende Sala na Rebekah. Shikaho chimene chashishileho, Ngunahase kusavala, kaha Nangupwa nacho, apwile nakutwama muchitwamo, kaha hanyima chindende Becky, kupwa mukulwane, ikiye apwilenga—apwile na mahinji amasuku kuhambakana Sala, kaha Becky kwiza nakulaha... kutona, kutumbuka hamuhela, kuhona kuhindula songo yenyi wapwevo wamundende, kaha ikiye kwiza nakuhita muzuvo, kulaha chikuma nge omu ahashile. Ikiye apwile nakuhanjika, “Tata, Tata...” Nangujika lihinji lyami limwe, kaha ikiye kutumbuka nakwiza, wakujikiza vene. Kusoloka nge—nge liuka lyakutona, munatachikiza, echi chinapu mukuhema ha lwola lwalusuku, munatachikiza, ha myaka handulendi. Ikiye ahashile kulijikijisa lyavene kanawa, kaha ikiye kuhaka mavoko eyi hali yami na kuhanjika, “Mamaah, yami Tata, Tata yami...”

50 Kaha Sala wamundende apwile, muchihwihwi, kuhinduka. Chamwaza, Ngunahono kutachikiza chipwe nge vana venu veji kulinga, mokomoko chiku; vami veji kulinga: uze wakanyike kumbata livoko lyami kushiula. Kaha shikaho Sala apwilenga na uvwalo wakusavala nawo wa Becky, kupwa nalihiji lyalisuku chikuma, munatachikiza. Kaha hano ikiye mweza, kupwa chindende wamwihhi, kuholoka, kutalyangila. Kaha mwaheta kuze, kukotokela chindende. Shikaho Becky kwalumuka chindende, kuhanjika, “Sala, ndumbwami wapwevo, Ngwatondo kumilweka enu chumachimwe.” Ikiye ngwenyi, “Ngwapwanga hano chatete. Kaha Ngukwechi chiyulo chosena. Shikaho Ngukwechi Tata wosena kaha kakweshi umwe nasalekoko wa yove.”

51 Omu mukiko mujila vathu vamwe kweseka kushinganyeka ha kulifukula, echi kacheshi? Huu-hu. Echi chakwoloka.

52 Kaha wamundende Sala, aholokele namahinji eyi amandende, kaha meso eyi alava amandende kwanduka

nakutala hali yami, kaha aputukile kulila. Kaha Becky ahakile chipoji hali yami, kungukumbata. Ngwamuzanga. Kaha Sala aputukile kutambuka nakuya mwomwo Becky akwechi Tata wosena. Ngwafumishile limbuli likwavo nge *ngachize* na kutambuka kuli ikiye nge *ngana*. Mamalelo, ikiye asehelele washiwashi kaha kulaha, kutumbukila halimbuli yami shikaho...Ikiye kashimbwilehoko kaha mahinji eyi kawahashile kulyata nahamavuko. Ikiye apwilenga nge chindende wakuhona kujikiza (pamo, nge Yami, chindende wakuhona kujikiza, munatachikiza), kaha ikiye kahashile... kahashile kuheta hamavuko. Ikiye kapwile chikungulwilo chachineneko, munatachikiza, kaha shikaho ikiye kahashile kushikumuka hamavu akukolako. Ikiye kashipwile chikumako.

⁵³ Kaha shikaho, ikiye apwilenga nge wakuhona kujikiza, kaha Ngwambile mavoko ami osena hali ikiye nge *ngana* kaha angukumbachile nakunguswenya chikuma, kaha ikiye avyakumwishile aze meso alava amandende, kaha atalile kuli Rabekah. Ikiye ambile ngwenyi, “Rabekah, ndumbwami wapwevo,” ikiye—ikiye ambile ngwenyi, “echi chinahase kupwa muchano nge ove uli na Tata wosena, oloze Ngwatondo ove utachikize chuma chimwe: Tata nangumbata yami wosena.” Shikaho...

⁵⁴ Mukiko...Kupwa kaha Ikiye angumbachile yamo wosena. Ngunahase kuhona kupwa nashikola hakuhaka vyuma vyavinene haze, oloze chikalu kaha Ngunatachikiza Ikiye angukwechi yami wosena, mukuhona kujikiza chami, kupwa nge Ikiye ngukwechi mavoko eyi osena hali yami, echi nachingulingisa kwivwa kanawa.

⁵⁵ Chamwaza, echa tuhane lizu likwavo lyalindende lya kulomba kuli Ikiye shimbu kanda etu tufukunune eli Lizu.

⁵⁶ Jino, Tata wa Mwilu, etu tunatachikiza nge etu tunapu vana nawa. Kaha—kaha Ove wazanga kupwa hamwe na etu, kaha kulifukula hamwe na etu. Kaha shimbu etu tuli nakulifukula kuli Ove, kaha Ove watuzanga etu, kaha watukwata mumavoko Ove, kaha tuma Shipilitu Yove Wajila, kaha tulingise tutachikize nge Ove wapwa mukakuyoya kaha Ove wapwa Tata yetu, etu twasakwilila Ove chikuma. Jino, echa Shipilitu Wajila enzenga kuli etu ufukuuno. Zanga kala muchima, Mwata. Tuhane etu kukisula chituta. Hingununa mamata alyume a keke hali etu, Tata. Kanda kutala hajishili jetuko. Jikiko jili jajivulu. Mwata, vakonekele kaha vakiko. Jijimbangane, Tata, kaha tumbate kaha mumavoko Ove, kaha—kaha hindula misongo yetu, kaha—kaha kosa myono yetu, kaha kasununa mashipillitu etu, Mwata, mangana tuhase kulifukula na kwalisa Ove, pwako nge vavandende vana kulaha nakujinguluka zuvo, tachikiza Tata ali nakutala hali etu. Tuhane echi, Mwata.

57 Jino, kakweshi muthuumwe nahase ku—ku kulumbununa eli Lizu. Etu tunatachikiza chize. Yowano amwene Mukanda mulivoko lya chilyo cha Ikiye uze atwamine halitanda, kaha kuze kwakapwilenga numba muthu mwiluko, mokomoko ha mavu, mokomoko mwishi ya mavu uze apwilenga wakutelamo kumbata Mukanda nakuusokolola, mokomoko kukasununa tutachikijilo. Kaha kwajile mwana Mukoko, uze napunga wakujiha kufuma kukwala chikuku cha kaye. Kaha Ikiye apwile wakutela. Kaha Ikiye ambachile Mukanda, kaha akasunuine tutachikijilo, kaha kufukununa uze Mukanda. Ove mwana Mukoko, twaya ufukuuno. Kufukununa uze Mukanda kuli etu, Tata, shimbu etu tuli nakuvandamina hali ove, etu twalombo echi mu Lijina lya Yesu, uze mwana Mukoko wa Kalunga. Amena.

58 Ngunasakula, ufukuuno, Chisoneka chachindende na vasi hano ya mazu atatu. Oloze chatete Ngwatondo kutanga vasi mokomoko jivali kufuma muli Mukajila Yowano, kapetulu 11 kuputukila ha vasi 23.

*Yesu himwamwamba ngwenyi, Ndumbwove
mwasanguka cheka.*

*Malita amwambile ngwenyi, Ngunatachikiza
ngwami...mwakasanguka hakusangukuka
chahalikumbi lya kukuminyina.*

*Yesu amwambile ngwenyi, Ami yami kusanguka,
kaha...kuyoya: ou mwangwitavila yami, chipwe nafu,
oloze mwakayoya:*

*Kaha wose nayoyo na kufwelela muli Yami keshi kuka
kafwako. Wafwelela echi?*

*Malita himwamwamba ngwenyi, Eyo, Mwata: Yami
ngunetavila ngwani Ove yove Kulishitu, Mwana
Kalunga, uze wakwiza hano hamavu.*

59 Kaha kupwa kaha namutwe wachihande Ngwatondo kuzachisa mazu atatu: *Ove Wafwelela Echi?*

60 Ngwatangile mujimbu lwola lumwe kunyima okwo. Ngwashingtonyeka wapwile mujimbu wakutunga kaha. Kaha vakakuzata vosena, Ngwashingtonyeka, ngunatange mumukanda wa Ndotolo. Ingraham wa—wa *Mwana Mwangana Waku Zuvo Ya Ndavichi*. Wapwa mukanda waunene. Uli, Ngwashingtonyeka, uli vene wakuhona kusoloka. Ngwakutonda kupwa nawo mukusoneka, shikaho Nguhase kuhaka mukachi ka vathu.

61 Kaha muze, Ngwapwile nakutanga chindende hali Lazalu, kaha hali Yesu, na Maliya, kaha Malita, ngachize, vandumbu vama pwevo va Lazalu. Kaha Ngwapwile nakutanga muze nge kuze Yesu ayoyelenga, Ngwafwela, na Malita na Maliya. Vakiko vosena vapwilenga vanyike vama pwevo va chi Hepelewu. Kaha

Lazalu apwile nakulinangula mokomoko kulilongesa kupwa mukakusoneka ha tembele, kusoneka jisona ja jishimbi ja vapilishitu.

⁶² Kaha Yesu apwile nakulikata chachinene, chikumanyi na Lazalu. Omwo etu twatangile mukanda uze kuze Ikiye ejile kwimbo lyavo, kaha Malita apwile wamundende hakulinangula ku mazu Eyi, oloze ikiye apwile nakuwahisa kulya chachingoloshi nakuwahisa mesa, oloze Maliya hanga natwamina kumahiji Eyi. Kaha Yesu ambile ngwenyi Maliya nasakula chuma chambwende.

⁶³ Kahajino, etu vanatulweke nge Lazalu ikiye anehele Yesu kuli Yowano, mu mujimbu wa mumukanda wa Ndotolo. Ingraham, kaha...ha *Mwana Mwangana Waku Zuvo Ya Ndavichi*. Chipwe ngocho, chize keshi kachapwile chamuchanoko, Ngunahono kutachikiza, oloze kupwa kaha nge chikuku cha echi, oloze Ikiye atelele kupwa wakuyoya na vakiko.

⁶⁴ Jino, etu tanapunga vakulinangula kwiza, uno mulungu, chipwe, nge omu Yesu ambile ngwe muli Mukakujila Yowano 5:19, “Ngwa...Uze Mwana keshi kuhasa kulinga chuma Lyaveneko, oloze chuma Ikiye mwamona Ise kulinga: chikiko mwalinga na Mwana nawa. Ou Tata eji kuzatanga na Mwana na ikiye hikuzata.” Talenu? “Chuma Ikiye mwamona Ise kulinga.”

⁶⁵ Shikaho hakulingisa ou kupwa mujimbu wakwoloka, Tata, Kalunga, atelele kuhanjika kuli Mwa Neyi, Yesu, kaha ambile ngwenyi, “Sepa lyove, Lazalu, ali nakuya nakufwa, oloze echi chili nakuya nakupwa chamwaza, shikaho Ove watela kuseza hemo. Fumako yako, mwomwo echi navakakuhula Ove kumulombela ikiye, mokomoko chamwaza, kaha—kaha Ngwatondo Ove ulinge ngachize.” Kachi enu namutala mumujimbu shimbu natuya, ove muya nakumona echi nachiya nakulilunjika kuliuze muchano wa ngachize. Shikaho, Yesu, chakuzeneka kala kuhuhumuna mokokomo kalachuma, atambukile nakufuma kuzuvo na kuya kumwe nawa, kahashile kukindulukako uze ufuku. Kaha Ikiye ayile kujimbongi jeka. Kaha hazevene Yesu asele limbo, kahajino naukalu wengilile.

⁶⁶ Kaha omwo Yesu mwaseza limbo lyove, ukalu uli mujila yakwiza. Anuka kaha, omwo Ikiye mwaseza limbo lyove, ukalu uli mujila. Omwo ove mwingila muli vathu na kuzata vyuma vyosena kuzachiwa muliuka lyove kanawa, nge yimwe yayinene sikisiteni cylinder Rickenbacker, kaha ove museza Yesu kusali yachize, omwo Yesu mwaya na kufuma muliuka, ukalu uli mujila. Eyo, mwane, omwo Yesu mwaseza chikungulwilo, nge vakiko vanamuhake Ikiye kusali na kuhanjika, “Chamwaza, jino etu katwafwelela ngachize vyumakana kupwa vene vyakwoloka,” kaha enu kwitavila chumachimwe nawa, ukalu uli mujila. Anuka kaha chize.

⁶⁷ Chilinakungwanukisa mujimbu wa Mwata Yesu, uze wawanyika mu Mukanda wa Luka. Munatachikiza omwo apwilenga kanyike walunga pamo wamyaka twolufu yakusemuka, vathu Jenyi vamumbachile Ikiye, nge mwaya chisemwa mumwaka mumwaka, kuze kuchilika cha Pendekosita. Kaha shimbu vakiko vapwile muze mumbongi ya Yelusalema ha chilika na kupwa na lwola lwamwaza, etu kuwana mu Mbimbiliya, nge vakiko vayile makumbi atatu chakuzeneka Ikiye. Kaha vakiko vashinganyekele pamo, vachimbachile nge chijililo, nge Yesu atela kupwa mukachi kavamwe vavusoko wavo. Jino, etu katweshi kuhasa kulinga ngachizeko. Omwo vakiko vejile nakuhita muli vausoko wavo nakutonda, Ikiye kapwile muzeko.

⁶⁸ Kahan etu katweshi kupwa nachijililo, kupwa kaha mwomwo etu tuli va Mesondisiti, Mbaputishiti, Pulishiteliyani, Pendekosita, kaha chikuku chetu na vakakuluka jetu vapwilenga vakakufwelela vavanene, etu twachimbachile, chamwaza, ha chinjililo, Yesu ali naetu. Etu katweshi kuhasa kulinga ngachizeko. Etu twatela kupwa vakulinunga na Ikiye hakumbi hakumbi kaha munyutu himunyutu. Mamalelo, Ngwazanga chize.

⁶⁹ Ngwatondo omu apwa Kalunga jino. Chumamuka visemi jami vapwa, chuma muka vakakuluka jami vapwilenga, chili chamwaza, oloze (Chuma vapwilenga nacho chapwilenga chamwaza.) Ngwashinganyeka etu tuli kwakusuku na jila.

⁷⁰ Echa tumone apwa chuma muka Ikiye lelo. Kangwatondele kutala kunyima na kutala chuma muka Mukulwane. Moody mwalinga, mwomwo etu tuli kwakusuku helu ya jila kuhambakana Mukulwane. Moody. Ukalu wamauka etu: etu tweji kutala kunyima nakuhanjika, “Chamwaza, echa tumone chumamuka Mukulwane. John Wesley ambile, vamwe veka vakwavo kuhanjika.” Ou ukiko mulonga sayasi ili nakutanduuka mumawande avo, kuhambakana kulifukula chili muze.

⁷¹ Hano myaka seli handulendi kunyima okwo, kasayatisiti waka French enjikijile nge kachi muya mulumbushi wa seti faifi mailosi ha ola, kaha gravitaion nayikumbata nakukufumisa hamavu. Ove unashinganyeka sayasi vavahase kutala kulichize lelo? Vakiko vali nakuya naiteni handulendi mailosi ha ola kaha hanga kuya lika. Vakiko vali nakushindakana nakuya kulutwe, kutala kulutwe. Oloze etu twatondo kutala kuyima nakutala chuma muka Moody mwahanjika; Sankey mwahanjika; Finney mwahanjika; Knox, Calvin; vamwe vaze. Chumamuka vakiko vahanjikile chapwile chakwoloka. Chize chapwilenga chisemunuino chavo, oloze etu tuli nakuya lika.

⁷² Kaka yami walunga endeselenga litemba lya ngombe. Yami nguli nakwendesa Ford V8. Mwanami walunga mwakendesa ndeke ya jet. Mukiko kaha, etu tuli nakuya nakwenda.

Mukiko chatela kupwa kulifukula. Echi Kwiza cha Mwata chili hakamwihi. Eli liuka lyatela kutambuka mujingolo jacho. Sayasi yinahase kaha kuyina chikuma kaha jino kaha yatela kuholoka, oloze etu tukwechi sulo yakuzeneka kukuma, ize kavakwatahoko, ya ngolo, jakuzeneka kukuma, ya Kalunga, ize etu twatela kutambuka nakwingilamo. Etu tuli nakuyoya a miliyoni milosi mwishi ya kutetela ufukuuno, kutetela cha Vakakulishitu kupwa nakuwahilila. Ngulinakwivwa sonyi ya amilyavene omwo Nangutala hano nakumona evi vanatungu, kaha misongo, kaha maukalu alinakuya lika jino. Liuka lyetu lyatela kutambuka mujila yakuka vakakuviza, kusangula vafu, kutapula vandemone, kulinga vinjikizo na vikomwesa, kulingisa kaye kosena kutachikiza nge Yesu Kulishitu ayoya. Omu mukiko etu tunatondo kulinga.

⁷³ Mwomwoika, ove muhanjika ngwavo, “Mukulwane. Moody kanda. . .” Mukulwane. Moody kapwile nakuyoya muli lino likumbiko. Echi chakwoloka. Etu tuli nakuyoyela Kwiza cha Mwata. Kaha etu tuli kaha nakumbata echi na chijililo nge Ikiye apwile na vausoko wetu. Oloze likumbi likwavo omwo mukakuhonesa ahonesele Mukulwane. Graham, etu kuwana nge Ikiye apwilenga mukachi ka vausoko wetu.

⁷⁴ Kulihi vamuwanyine Ikiye? Kulihi vahashile—kulihi vakiko vamuwanyine Yesu? Hazevene vamuselele Ikiye. Kuli vakiko vamusele Ikiye? Kuze kuchilika cha Pendekosita. Kulihi twamuseze Yesu, kuliuka muka? Ku chilika cha Pendekosita. Omwo etu natufumako muli luze lwola lwamwaka lwa ngolo ja Chipendekosita na chilika cha pendekosita, etu kutambuka nakufuma kuli Yesu. Echi chili vene chakwoloka, sepa. Etu tuli nakuyoya mwishi ya kutetela chetu. Eyo, mwane.

⁷⁵ Vakiko vamusele Ikiye haze ha chilika cha Pendekosita, kaha chize chikiko kaha chihela chize Mesondisiti, Mbaputishiti, Pulishiteliyani, kaha Chipendekosita kaveshi kuhasa kumuwana Ikiyeko, nakinduluka kuze Ikiye mwamuselele. Nyi kuwahilila cha Mwata? Nyi ngolo ja Mwata jikulihi? Eli liuka lili nakuhula lelo, “Chumamuka—chumamuka chasolokele kuli Kalunga wakushikulu?” Ikiye alinakuvandamina vathu Jenyi kusanyika Ikiye hazevne. Oloze va . . .

⁷⁶ Etu katweshi kuhasa kulinga echi kuhichila mu vikungulwilo. Etu katweshi kuhasa kulinga echi mwishi ya psychology. Etu katweshi kulinga echi mwishi ya makumi, mokomoko etu katweshi kuli echi na shikolako. Etu tweji kulihandununa etu vavene, kulipangununa etu vavene. Etu katweshi vakulipangununako. Etu vathu umwe vene muli Yesu Kulishitu. Etu tuli vosena umwe muli Kulishitu, kaha vikungulwilo vyetu kanda lyehi valinge echi. Nge kuwaha nge omu vali vakiko, vakiko kaveshi kuhasa kulinga echiko. Shikola yetu ikiko chakuhonesa chachinene Mujimbu wamwaza vatwama nacho, yinapu shikola.

77 Chuma etu tunatondo keshi shikolako. Etu tunatondo ngolo na chikungulwilo cha Shipilitu Wajila kukinduluka cheka muliuka nakusolola ngolo. Yesu kahanjikile ngwenyi, “Yenunga mukaye kosena na—na kunangula.” Ikiye kahanjikile ngwenyi, “Yenunga mukaye kosena nakulinga . . .” Ikiye ambile ngwenyi, “Yenunga mukaye kosena nakunangula Mujimbu wamwaza.” Kaha ou Mujimbu wamwaza naukaya nakusolola ngolo ja Shipilitu Wajila, chize kusanguka. Etu hanga tuli miliyoni mailosi kuhihilamo kuhambakana omu twatela. Echa etu tutambuke nakuya kulutwe. Echa tukinduluke kunyima kuze etu twamusele Ikiye kuze ku chilika cha Pendekosita.

78 Yesu ambile ngwenyi, mu Yowano, Ngwafwelela, kapetulu 15, Ikiye ambile ngwenyi, “Yami Muvinyo; enu mumutango.” Chamwaza jino, kachi uze Muvinyo nauneha mutango watete, kaha kufuma kuliuze mutango kusoneka Mukanda wa Vilinga, mutango wamuchivali nauya nakulingisa Mukanda ukwavo mu Vilinga. Mutango wamuchitatu nauya nakuneha Mukanda ukwavo wa Vilinga. Kaha kalamutango nawiza nakulovoka muze mu Muvinyo nauya nakupwa chochimwe nge mutango watete wapwilenga.

79 Jino, enu munahase kunungako, etu tunatachikiza. Ngunamono mitondo yamihako na pamo miyachi yamihako yakuhandunuka handunuka. Ngunamono mutondo wa malalaja kuneha mihako, na malimau, kaha vyuma vyosena kala kuwakiko, oloze vakiko vakunungilamo.

80 Uze ukiko ukalu uli lelo. Etu tuli vakunungila na mangana amwe, vananungilamo mu vikungulwilo, oloze kachi nge mutongo nauneha muhako ukwavo muvinyo, uvene, nachiya nakupwa nge uze muhako watete uze wengililemo. Haleluya! Mamalelo, liuka nayikaya nakuliwana, oloze etu twatondo ngolo jize jakumaputukilo. Etu twatondo Shipilitu Wajila, ngolo ja kusanguka cha Yesu Kulishitu. Echi chikiko Ikiye atulwekele etu kulinga.

81 “Yami mu Vinyo, enu munapu mumitango.” Kachi grapevine nauneha mutango, kaha nawiza na kuwaha chawo, muvinyo naushisaho nauneha cheka kuwaha chauze mu grape. Kachi Muvinyo watete kwiza nakulovoka, kaha vakiko nauholoka mwishi ya Shipilitu Wajila, kaha vakiko valingile vikomwesa vyavinene, kaha vinjikizo, kaha kujika unjiho kukaye . . . Numba vavavulu na maunjiho avo, vakiko, na manyinga avo, vakiko vajikile unjiho wavo. Vakiko vayile nakuhita mumaukalu osena na vyuma vyosena nakuneha Mujimbu wamwaza. Vakiko vayajile; vakiko vavavetele; vakiko vavazangamishile. “Kumana vatutwale kwimbo Mwilu, hakahela kajitemo kakavovwu, shimbu veka vazungile nakutapa numba kutambula fweto, kaha kuhita mukalungalwiji wa manyinga?” Chuma muka etu natushinganyeka kulinga? “Ngwatela kuzunga numba Nguyule. Tohwesa kuzama chami, Mwata.” Punduvene. Etu twatondo . . .

⁸² Etu katwazangile chikungulwilo chachihya. Etu katwazangile liuka lyalihya. Chuma etu twatondo lelo chize kuvilika, kukumbulula chachihi, kujiha shili cha kuhizumuka cha Chipendekosita cha lwola lwamwaka, uze apwile wakusemuka ha Pendekosita kaha kukinduluka muliuka cheka, ngolo ja Shipilitu Wajila cheka, kuneha Yesu hazevene.

⁸³ Uze Kalunga wakushikulu lwola lwosena eji kukatukanga hazevene mulwola lwalukalu. Etu twatondo echi. Uze ukiko ukalu na mauka etu lelo. Etu tulinakukinduluka kunyima. Etu tunaholoka mujifashoni ja kaye. Kaha makumishilo, hamwaka ha mwaka, nayiputuka kufwa chindende kaha kuzuza.

⁸⁴ Lunapu lwola lwakutunuma lunahete lyehi. Kalunga mwaya nakuvatula vene nge omu Ngunema hano hakamenga. Kalunga mwaya nakumuvatula nyima yenyi mangana emenga mihako. Ikiye mwaya nakuvatula milimo ya kano kaye kufumisa muli ikiye likumbi limwe mumakumbi awa. Chuma kana chasonyi, mujila liuka valimbachile mwishi lya lijina lya kulifukula.

⁸⁵ Kaha etu tunawane, omwo Yesu ayile, kufwa chengilile. Omwo Yesu afumine muliuka, ngolo ja Shipilitu Wajila jafumine muliuka, lyaputukile kundengandenga na—na kufwa. Kaha hanyima shimbu kakwapwile nachuma chimweko. Jino, omwo Yesu ayile, kufwa chengilile. Mamalelo, chuma kana lwola lwaushona.

⁸⁶ Kaha talisenu, vakiko valikomokelele nakijinguluka, kaha vakiko vasanyikile Yesu, oloze Ikiye kejileko. Vakiko vamusanyikile Ikiye cheka, kaha Ikiye kejileko, oloze Ikiye atachikijile chuma mwaya Ikiye nakulinga. Ikiye natachikiza ufukuuno, chuma muka Ikiye mwaya nakulinga. Kachajimbale na Ikiyeko: Ikiye atachikiza vene chuma muka Ikiye alinakuya nakulinga. Ikiye mwaya nakumusangula vathu, kupwa kaha vene nge omu Ngunemana muno mu kamenga. Ikiye mwaya nakusangula vathu ha Lijina Yenyi kuvafumisa muchisemunuino cha Vakamafuchi eka na eka. Ikiye mwaya nakuchilinga.

⁸⁷ Lunapu lwola lwa va Yuleya lunahete lyehi jino, kaha Vakamafuchi eka na eka valinakukuma, mwomwo vakiko vayile kaha. Vakiko kukana Kulishitu; vakiko vali nakukana vinjikizo; vakiko valinakukana vyuma vize vavuluka vya ukalunga, kaha kuvivuluka kupwa nge vishimo mokomoko ngolo ja liyavolo kaha nakulinga. . . Vakiko kusaula Shipilitu Wajila na kujika vavene kufuma kuli Kalunga. Kaha Kalunga mwaya nakupwa navaze vavandende, hanyima shimbu, na kukatula Liuka lyangolo, kaha jino kwalumuna Shipilitu kuli va Yuleya, kaha kumbata Liuka lya Vakamafuchi eka na eka kwimbo. Chili vene chakwoloka. Ikiye ali mukutungika jino. Chamwaza, etu tuli mulwola lwamakumishilo, hakamwihi.

⁸⁸ Yesu, Ikiye atachikiza. Kaha hanyima shimbu Ikiye ambile ngwenyi, “Sepa lyetu Lazalu na savala tulo.”

⁸⁹ Mwomwoika, vase tumbaji vashinganyekele ikiye apwile nakuhanjika kunoka chindende. Ikiye ambile ngwenyi, “Chamwaza, kachi ikiye nasavala, ikiye ali nakulinga kanawa.”

⁹⁰ Chamwaza, Ikiye ahanjikile muze Mwenyi...mazu avo, shikaho vakiko vahase kwivwushisa, ambile ngwenyi, “Ikiye nafu, kaha mwomwo yayenu Ngunawahilila Kangwapwanga kuzeko.” Talenu? “Mwomwo yayenu, Ngunawahilila Kangwapwanga kuzeko.” Mwomwo vakiko kachi vapwile nakumulomba Ikiye mangana amu—amu hindule—na kumuhindula ikiye, oloze Ikiye atachikijile Ikiye kachi lingileko, mwomwo chize chimweno chapwilenga...hanyima yaaze makumbi awana Ikiye atachikijile nge lwapwile lwola Ise amulwekele Ikiye. Omu chawahile; Ikiye ambile ngwenyi haze halifuka, “Tata, Ngwakusakwilila Ove, Ove unevwu lyehi, oloze Ngunahanjika kaha hali ava vanemana.” Talenu? Ikiye atachikijile chuma muka Ikiye apwile nakulinga. Ikiye ambile ngwenyi, “Nanguya nakumuhindula ikiye.”

⁹¹ Jino, Ngunahase kushinganyeka nge limbo lyalindende lyapwile vene lyakuhokoka. Uze tungalimbo nayi, kuhomba. Mamalelo, echi chili chamwaza omwo enu namupwa na limbo lyakuhomba mokomoko muchima wakuhomba, kaha jino Yesu kusoloka vyosena hamwe, keshi ngochoko? Ngunahase kushinganyeka kumona Malita, pwevo wamwaza na lihina lilava kumeso eyi, kaha Maliya wamundende, kaha vakiko kumukwachilila, kuhanjika, “Chuma muka etu twatela kulinga? Tata na Mama nayi, kaha ndumbu walunga wamwaza...Jino, etu tunaseze liuka, kaha etu vanatuhange kufuma mulivakiko, kaha kwiza nakulovoka nakukavangiza Yesu waku Nazaleta. Kaha Ikiye nafumu kaha natuseze etu, kumwe.”

⁹² Ngunahase kwivwa kutoleka kwiza nakuhanjika, “Ha, nyiuze Mukakuka cha Ukalunga ali kulihi, uze Kapolofweto wa Ngalileya? Ikiye Alikulihi jino? Talenu, omwo echi chili vene nakwiza lwola hali Ikiye kulinga chuma chimwe, Ikiye nayi.” Hakiko echi. Talenu, Kalunga azanga kulinga ngachize, kwecha kaha vathu, kupwa kaha, echa vathu kusolola vapwa chumamuka, yaah, kweseka kaha vakiko kumona chuma vakiko vali vene. Ikiye eji kuvahana vakiko kukisula. Ikiye asolokele, kulisolola Lyavene, kulijimbula Lyavene kuli vathu, kumona kaha muyachi muka wavilinga vakiko navaya nakulinga, kumona kaha chuma vakiko navaya nakulinga hali chize.

⁹³ Jino, etu tunawane jino, hanyima ya—ya makumbi amandende, makumbi awana, uze Lazalu apwile wakufwa. Vakiko vamufunjile. Likumbi lya muchivali, likumbi lya muchitatu, likumbi lya muchiwana...Jino, kala muthu natachikiza nge kupola chinengila hanyima ya makumbi atatu:

lizulu linafwoveka kumeso eyi, chatete. Kaha jino kupola chinengila; misanguya vanaputuka kulya uze mujimba. Vakiko vamusavalikile muze mumavu, kuhakako lilolwa haze helu lya chimbumbembe kuze vamuhakile. Kaha shimbu yayindende, vase vanyike vamaawevo valovokelenga na kufukama hamavu haze ha chimbumbembe na kulila.

⁹⁴ Kaha hanyima chindende, mujimbu wayile nakujeinguluka, “Yesu neza. Etu Twamumonanga kutambuka muze mumbongi.” Mamalelo, uze kanyike Malita, uze napunga ngocho, kusoloka, wakushimbwokela hali chize, ikiye enjikijile kusoloka ikiye vamutungana nachuma muka. Hano nomu ejile. Ikiye ejile mujila yenyi, kulaha nakutonda. Ngunahase kwivwa vamwe kwiza mujila nakuhanjika, “Chamwaza, Ngunashinganyeka ove unasuuluka, nge kulifukula chove chapwilenga chamakuli.” Ikiye avahumbwile vakiko na kuyalika, kuhita hazevene ha kutoleka. Ikiye ayile palanga ikiye amumwene Ikiye, pamo kutwama hamavu mujila haze yafumbila.

⁹⁵ Jino, echi chinasoloka, ikiye atela...ikiye nahase kupwa na lisesa lyakumutachikiza Ikiye na—na kuhanjika upi kuli Ikiye. Mwomwoika, ikiye kalahileko na kuhanjika ngwenyi, “Tala hano, tala hano, Enu. Ove watela kupwa Kapolofweto, Muthu wa Kalunga. Mwomwoika Ove wahonena kwiza omwo etu twakusayikile Ove? Mwomwoika, etu twapwanga chuma chakuseha kuli ino mbaka. Etu twejile nakulovoka muliuka nakukukavangiza Ove.” Kusoloka nge ikiye apwile na lisesa. Oloze munatachikiza, kupwa kaha nge Ngwanangwile ha, *Uze Mukoko Na Katela*, kachi etu tuli mukoko, mukoko atela kuhana lisesa lyenyi lyosena. Echi chili vene chakwoloka. Ikiye keshi nachumako oloze ungoni, shikako atela kuuhana. Kaha enu hanenu lisesa lyosena eli muli nalyo mangana muzachile Kalunga. Echi chili vene chakwoloka.

⁹⁶ Ngwapwile nakupwile nakupwa hanyima ya mapwevo kupwa mujila vapwilenga nakuvwala tuze tuuvwalo twatundende, munatachikiza, kaha vakiko vambile ngwavo, “Chamwaza, etu twapwa—etu twapwa vaka America. Etu tunahase kulinga chuma etu twatondo.”

⁹⁷ Ngwambile ngwami, “Echi chili vene chakwoloka, oloze kachi ove uli mukoko, ove muya nakuhana malisesa ove.” Kunwa makanya na kutwalilaho nge ngachize, nge chuma chachipi kuli pwevo kuchilinga. Echi chili vene chakwoloka.

⁹⁸ Pwevo wakalemesa ahanjikile kuli yami, keshi kunyima chikumako, kuhanjika kuli yami, ambile ngwenyi, “Oloze, Ndumbu walunga Branham, vakiko kaveshi kutunga mauvwalo ekako.”

⁹⁹ Ngwambile ngwami, “Oloze vakiko hanga vatunga makina akutongesa na kulanjisa vyuma. Kakweshi kaleyelo hali chizeko.” Echi chili chakwoloka.

100 Anuka, likumbi limwe, enu munahase kupwa vatoma hano kuli lunga lyove, oloze ove mukaya nakukumbulula ha ujila hali chize, kupwa kaha vene: “Wosena mwatala hali pwevo nakumuvwila lushuushu, nalingi neny ujila haze vene mukachi ka muchima wenyi.”

101 Ukalu ulihali na mapwevo lelo va Chipendekosita, chikiko Nguli nakulikomokela. Omwo enu munafumu mumukana wa wina. Omu manenu vapwilenga nakuvwala jikambu jajisuku, na lelo mapwevo va Pendekosita kulikwita ulombo nge lizavu lya Makishi Akutunga, na kuteula jikambu, kaha kuvwala uvwalo wawihhi nge ngachize, kupwa kaha nge vosena vamujila...kulovoka na kutambuka muchipato na musana, omwo malunga kwiza, enu munatachiza, pwevo, nge enu namukaya nakukumbulula hakulinga ujila na vaze malunga? Enu kulisolola enu vavene ha pungu kana. Echi chinapu shipilitu ha liuka na vathu, kaha vakiko vanahono kutachikiza echi. Kapuputa na kuhona kutachikiza echi. Ou unapu muchano.

102 Pamo enu munahase kuhanjika nge Kangweshi nalisesa lya kuhanjika ngachize nge mukakwambulula mujimbu. Chamwaza, Ngwa—Ngwatela kukavangiza kutwaminyina cha Shipilitu Wajila; mukiko kaha Ngwatela kuhasa kuhanjika. Enu...Kachi Nangukamiwana kuze kuchisopelo, kahajino Kangweshi ngukapwe na manyinga enuko kumavoko amiko. Fumenu hamavu osena aze anasoloka kupwa nge a Liyavolo. Twamenu hahasuku na echi. Fumenu kuli echi. Kangwalizakaminako vatanganyika vahavisaji vanagahi... Enu kamweshiko, kuno, kupwa tanganyika wahachisaji; kaha ove kaweshi kupwa mwana wapwevo wa Kalunga ko.

103 Kunangula muliuka lya kafunga chimene chikwavo, ha ndungo wamwaka, lwola vakiko vapwilenga nakunakulanjisa vandungo kunyima okwo. Kaha vakiko vapwilenga nakwiza na kuvalanda haselu. Kaha vathu vapwile, vakiko vapwilenga nakutetumuka, nakulila, mwomwo mumembo avo; vakiko kaveshi kukahasa kakinduluka chekako. Kaha vakiko vapwilenga nakuvaveta. Kaha vakiko vavalanjilenga nge omu valinakulanda jimotoka, kala chuma, mitengo, kaha kuvalanjisa vathu.

104 Kaha likumbi limwe, mukakulanda ejile, mukakulandulwila, muze muchikuku chachinene...wande waunene, ngocho. Kaha ikiye ambile, “Uli navandungo vangahi vakulanjisa?”

105 Ambile ngwenyi, “Chamwaza, Ngukwechi vamwe vakutambasana.” Vakiko valinakweseka kupwa vavanene. Mbata manevo, masevo...Kachi nge pwevo vambachile apwile pwevo wakuzeya, mabata malunga vakulikangula nakugasemesa na...nge tuvalu na tunyama. Kachapwile chakwolokako. Kalunga atungile muthu. Muthu natungu

vandungo. Echi kacheshi chakwolokako kufuma kukuputuka, kachapwileko. Kalunga katonda kachi kala muthu kupwa ndungoko. Nduma, mwane. Kaha nduma. . . Tala chuma muka chasolokele.

¹⁰⁶ Kahajino mukachi kavize vyosena, uze mukweze ambile ngwenyi, “Chamwaza, Ngunatondo kulanda vamwe. . .” Ikiye amwene umwe mukweze muze. Vakiko kavahashile kumuvetako. Chipoji chenye chapwilenga helu, mutwe wenyi helu, kupwa kaha nge muthu wautongwe, kutambuka nakujinguluka. kaha uze mukakulandulwila ambile ngwenyi, “Ngunatondo kumulanda.”

¹⁰⁷ Ikiye ambile ngwenyi, “Oloze ikiye keshi wakulanjisako.”

¹⁰⁸ Ikiye ambile ngwenyi, “Chamwaza, mwomwoika?” Ambile ngwenyi, “Ikiye mukulwane wavo?”

¹⁰⁹ Ikiye ambile ngwenyi, “Chiku, ikiye apwa ndungo.”

¹¹⁰ “Chamwaza,” ambile ngwenyi, “mwomwoika? Ove weji kumulisa ikiye kuhamabakana omu weji kulisanga vosena?”

¹¹¹ Ikiye ambile ngwenyi, “Nduma. Ikiye eji kulilanga hamwe navakwavo vosena. Ikiye apwa ndungo.”

¹¹² Ambile ngwenyi, “Chuma muka chamulingisa ikiye kupwa wakuhandunuka kuhambakana vakwavo?”

¹¹³ Kaha uze mukulwane, “Ngwalikomokela nge yamilyavene halwola lwalusuku, oloze likumbi limwe Ngunawane nge. Kuze kulifuchi lyavo, ize pwa mwangana wa muyachi. Kaha chipwe ikiye napu ngeji wakufuma kulifuchi lyavo, ikiye hanga atachikiza nge ikiye mwana mwangana kah ikiye eji kulisolola lyavene nge umwe.” Kachi nge. . . Kachi muthu wa mu Africa nahase kutachikiza ise kupwa mwangana, kaha hano tuli mulifuchi lya ungeji tunahase kutachikiza kusali ya kalungalwiji ikiye apwa mwana mwangana, omu mapwevo na malunga vavene vatela kuyoya nge muvana vamaalunga na mapwevo va Kalunga? Yoyenu nge omu. Punduvane. Yoyenu enu vavene; likosenu enu vavene na kulinga nge vana va malunga na vamaalunga va Kalunga. Chipwethu, seteko yamuyachi ngachilihi.

¹¹⁴ Hano etu tuli. Mamalelo, Malita wamundende, ejile nakulaha. Ikiye asolokele nge ikiye apwile na—na jila yakupwa na kuhanjika chuma chimwe hali Ikiye. “Mwomwoika Enu mwahonenanga kwiza kuli ndumbwami? Tala vyuma etu twakulingila Ove, kaha Ove kutuleununa ngana.” Chamwaza, kachi ikiye ahanjikile ngachize, mujimbu kachi wakumine mujila muze achilingile. Nduma, mwane. Eyi ili jila yakupandaminamo ku wana wa Ukalunga wa Kalunga. Kachi Kalunga kutuma wana, enu muli kupanda kuukiko mwakwoloka. Kachi enu mwahasa kuwana chuma chimwe kufuma kuli chize, enu mwatela kupanda mwakwoloka kuukiko.

Kaha Malita atachikijile chize. Ikiye pamo atangile hali uze ka Shunema wapwevo na uze kema yenyi. Kaha ikiye...Kachi uze ka Shunema wapwevo atachikijile nge Kalunga apwile muli Elija, mwahambaka chikuma Ikiye kupwa muli Yesu? punduvene.

115 Shikaho, ikiye ayile na kupandama chakwoloka. Ikiye alahile na kuholoka chameso hamavu kumahinji Eyi. Ngwazanga chize! Kuholoka chameso hamavu kumahinji Eyi kaha ambile ngwenyi, “Mwata...” Chize chihela Chenyi chakwoloka. Muze mukiko Ikiye apwile. Ikiye apwile Mwata wenyi. “Mwata, kachi Ove wapwanga hano, ndumbwami kachi kafwileko.”

116 Mamaah, yami! Mamalelo, Ngunahase kaha kushinganyeka kumona muchima Wenyi waunene omu Ikiye atalile hali uze pwevo wamwaza, masoji kuhita akupwelumuka kumakili eyi. Ambile ngwenyi, “Mwata, kachi Ove wapwanga kuno, ndumbwami walunga kachi kafwileko.” Tala chuma ikiye ahanjikile. “Oloze chipwe oholili jino, Mwata, chipwe ikiye nafu, chipwe chikova misangunya navatambukamo mumujimba wenyi, chipwe oholili, Mwata, kala chuma Ove mulomba Kalunga, Kalunga mwaya nakukuhana nacho Ove.”

117 Mamalelo, chize chinapu chiswamo. Enu munahase kuhanjika, “Ngunahichi muvipatela vyosena. Va ndotolo ngwavo Nguli nakuya nakufwa, oloze chipwe oholili, Mwata... Nguli ulukutu na kutenda muvifuwa; Ngunahase kutambuka, oloze oholili jino, Mwata...”

118 Uze kema wamundende apwile na mutwe wakuzala na meya uze waunene ufuku unahichi ngana. Kuli chuma chimwe enu mwatela kulinga. Echi chinahase kutanduuka nakutuva uze mutwe waundende nakufwa, “Oloze numba oholili jino, Mwata...” Ikiye hanga apwile Kalunga youmwe. Ikiye hanga apwile Mwata youmwe. “Numba oholili, Mwata...” Kaha Ikiye kutwama kulivoko lyachilyo lya Kalunga Waundume, kupwa na kutuhakwila hali vyuma vize etu twalivuluka nge Ikiye natulingila etu.

119 Jino, Nguli nakwivwa vene nge kulifukula. Punduvene. Enu muli nakuya nakungusanyika kupwa mukakujila wakulyalanga kala mwosena omwo, shikaho enu munahase kuputuka, kaha pwenu nacho.

120 Shikaho, eyo, mwane, “Numba oholili, Mwata, kala chuma Ove mulomba Kalunga, Kalunga mwaya nakuchilinga.”

121 “Lombenu Tata kalachuma mu Lijina Lyami, Nanguya nakuchilinga,” Yesu ahanjikile ngocho.

122 “Numba holili, Mwata, Kala chuma Ove mulomba, Kalunga mwaya nakukuhana Ove.” Mamalelo, chize chahashile kwalumuna muchima Wenyi waunene.

123 Ikiye ambile ngwenyi, “Ndumbwove walunga mwaya nakuyoya cheka.”

124 Ikiye ambile ngwenyi, “Eyo, Mwata. Ikiye mwaya nakuyoya. Ikiye pwile kanyike wamwaza. Ikiye mwakaya nakwiza mukusanuka chavosena halikumbi lyakukuminyina.” Vaze va Yuleya vafwelelele mukusanguka chavosena. “Ikiye mwakaya nakwiza mukusanguka chamakumbi akumakumishilo.”

125 Tala hali Ikiye. Ikiye akokele uze uvene Wenyi waundende hamwe. Ikiye ambile ngwenyi, “Yami Kusanguka na Kuyoya.” Mamaah, yami. Kanda lyehi kupwenga muthu ahashile kuhajika ngachizeko. Kakweshi kukapwa muthu mwaya nakuya kulutwe, nahase kuhanjika echi. Ikiye napu Umwe nahase kuhanjika echi. “Yami Kusanguka na Kuyoya,” mukiko mwanambe Mwata. “Wosena mwangufwelela Yami, chipwe mwapwa wakufwa, oloze mwakaya nakuyoya. Kaha wose nayoyo na kufwelela muli Yami keshi kuka kafwako. Wafwelela echi?”

126 Ikiye ambile ngwenyi, “Yaa, Mwata.” Mamalelo, ikiye atachikijile chumachimwe chapwilenga nakwiza nakusoloka. Chatela kupwa.

127 Omwo lufwelelo kufuma mu muchima wakushishika kuliwana na Kalunga, aze mazo kwihamwe nge *ngana*. Chumachimwe chatela kusoloka. Ngunahamwisa eli lukungumbuwa ufukuuno, mu Lijina Iya Yesu Kulishitu, echa lufwelelo lwenu kulinunga na Kalunga nge ngachize, mu minyutu yayindende etu natuya nakupwa na Pendekosita ikwavo. Nakuya nakupwa kuhizumuka kulovoka muli ino mbaka, kakweshi numba kuhasa kupwa numba vamivwimbimbi vyahavisaji kupwa vakutamo muno mulifuchi navahasa kuhonesa. Echi chakwoloka. Nakuya nakupwa kuhizumuka chivene. “Numba holili, Mwata. . .”

128 “Chamwaza, Mwata, etu twafumu hali *echi*; etu twalingi *echi*, kaha kulinga *chize*.” Kangwalizakaminako chuma muka ove unalingi, “Numba oholili, Mwata. . .” Ikiye ali nakuvandamina hali ove kusanyika hali Ikiye. Ikiye. . . “Ove wafwelela echi?” Punduvene. Eyo, mwane. “Numba holili, kala chuma Ove mulomba Ikiye. . .”

129 “Kulihi munamusavalika?” Jino, Ikiye mwaya nakushikumuka kulifuka. Ikiye apwilenga muthu wakutela kulila; Ikiye apwilenga Kalunga wakutela kusanguka vafu.

130 Hano lwola lwakunyima, uze pwevo uze apwilenga wakupandama kulizavu limwe lyavathu. . .Kangwachimbata nge tatoko kuchilingisa nge vikungulwilo. Oloze ou pwevo. . . Vakiko kavafwelela nge Yesu apwilenga Ukalunga. Vakiko vambile ngwavo Ikiye apwilenga kaha kapolofweto. Jino, Ikiye apwilenga. . .Kachi Ikiye apwilenga kaha kapolofweto, etu tuli vosena mushili. Ikiye apwile chipwe Kalunga, kwapwile wekako shina Kalunga, mokomoko mukakuhungumwisa wamunene

kaye kanda lyehi vapwenga nenyi. Echi chakwoloka. Ikiye apwile wakuhambakana muthu. Ikiye ambile ngwenyi, “Ikiye kapwilenga Ukalungako.”

¹³¹ Muli vya muyachi ngana mumijimbu yachiseke lelo; kweseka kulingisa Yesu Kulishitu kupwa nge kapolofweto. Mwomwoika, Ikiye apwilenga Kalunga wa tupolofweto. Punduvane mukiko apwilenga Ikiye.

¹³² Ikiye ambile ngwenyi, “Nanguya nakwinjikiza kuli ove na Mbimbiliya yove, ‘Ikiye apwilenga kaha muthu.’”

¹³³ Ngwambile ngwami, “Ove chilinge echi.”

¹³⁴ Kaha ikiye ambile ngwenyi, “Omwo Ikiye ayile kuchimbumbembe cha Lazalu, eyi Mbimbiliya yahanjika ngwayo, ‘Ikiye alilile.’ Ikiye atelege kupwa muuthu mokomoko Ikiye keshi kuhasa kulilako.”

¹³⁵ Ngwambile ngwami, “Pwevo wakalemesa, echi chinapu Chisonoka chove?” Kangwatwalile kupwa nge mukakulifukula hano nakuhanjika echi, oloze Nanguya nakumulweka chuma Ngwamulwekele.

¹³⁶ Ikiye ambile ngwenyi, “Mukiko chili.”

¹³⁷ Ngwambile ngwami, “Ize hanjikiso ili yakuzeya kuhambakana na musoji wakufuma kuli kasumbi wakufwa kuzala.” Ngwambile ngwami, “Chamwaza, ove—ove kaweshi na chuma chimwe hakwimanyinako.”

¹³⁸ Ikiye ambile ngwenyi, “Mwomwoika, Ikiye alilile. Chize chikiko chasolwele Ikiye muuthu.”

¹³⁹ Ngwambile ngwami, “Ikiye apwile mwosena muvali muuthu na kuzeneka kupwa muuthu. Ikiye apwilenga Kalunga mumusonyi.”

¹⁴⁰ Ikiye ambile ngwenyi, “Mamalelo, chakuzeneka mangana!”

¹⁴¹ Ngwambile ngwami, “Ikiye ayile kuchimbumbembe nakulila. Chize chapwile muchano uvene wakutamo, oloze omwo Ikiye alyolwele Lyavene chindende...” Eyi Mbimbiliya yamba ngwayo, “Kuze kakwapwile chuma chakutala chikumako hali Ikiye; numba kuwaha etu tunahase kumufwila Ikiye.” Oloze omwo Ikiye ambile mafwiji eyi amandende hanyima kaha ambile ngwenyi, “Lazalu, lovoka,” kaha muthu napunga wakufwa mumakumbi awana kaha wakupola muchimbumbembe, ikiye alovokele. Chize chapwilenga chachinene kuhambakana muthu. Ngulweke yami muthu nahase kulinga ngachize. Chumamuka chize? Kupola chatachikijile Mwata wenyi. Kuyoya chatachikijile Tenyi yacho. Chuma chimwe chasolokele. Ikiye ahanjikile kaha muthu uze apwilenga wakufwa kaha muchimbumbembe mumakumbi awana, asangukile cheka, kaha kwimana hamahinji eyi, kaha ayoyele. Haleluya! Uze apwilenga Kalunga muli Mwa Neyi. Eyo, mwane. Uze apwilenga Kalunga

kulingisa Lyavene kumutachikiza kuhichila muli Ikiye, Mwana. Uze apwilenga Kalunga kuhanjika, keshi muthuko.

¹⁴² Ikiye apwile muthu omwo Ikiye atalile haliuze mutondo lize likumbi ha chumachimwe chakulya. Uze apwilenga muthu. Oloze omwo Ikiye ambachile chize jimbolo jitanu na va ishi vavali nakulisa masauzande atanu, chize chahambakanyine muthu. Uze apwilenga Kalunga kuvalisa vakiko muze. Ikiye apwilenga kuhambakana kapolofweto, kuhambakana muthu, Ikiye apwilenga Kalunga Muthu. Punduvene.

¹⁴³ Ikiye asavalile chanyima muwato uze ufuku, kaha tulungalwiji kutahwoka na kukinduka nge chifwiko chakumutumwa muze vene mukalungalwiji wamunene, omwo teni sauzande ya maliyavolo va kalungalwiji valishingile kumujimika Ikiye uze ufuku. Ikiye apwilenga muthu, wakuzeya na aseyele kufuma mukulombelela vakakuviza, kusavala kuswanga muze; kaha peho kayahashile numba kumuluwanganyisa Ikiye. Ikiye apwilenga muthu omwo Ikiye apwile nasavala, oloze omwo Ikiye ahindikile, kuhaka lihinji Lyenyi hatongo ya wato, atalile nakuhanjika, kaha ambile ngwenyi, “Kuunda, unda,” kaha jipeho na makimba kumwononoka Ikiye, chize chahambakanyine ikiye kupwa muthu. Uze apwilenga Kalunga muli muthu, kulilingisa Lyavene kumutachikiza. Echi chakwoloka.

¹⁴⁴ Ikiye apwilenga muthu ha kulusu omwo Ikiye alilile kutonda keke. Omwo Ikiye alilile na kuhanjika, “Ngunevu pwila,” uze apwile muthu. Omwo Ikiye afwile, Ikiye apwile muthu, oloze ha Paseka na chimene omwo Ikiye ahokwele kaze katachikijilo ka kufwa, hetese, kaha chimbumbwe, kaha asangukile cheka, Ikiye apwile wakuambakana muthu: Echi chapwilenga Kalunga kusoloka. Shikangaho mukakusoneka ambile ngwenyi:

Kuyoya, Ikiye anguzangile yami; kufwa, Ikiye
anguzangile yami;
Kufunda, Ikiye ambachile shili jami
kwakusuku;
Kusanguka, Ikiye anguvulukilile kwoloka
haya myaka:
Likumbi limwe Ikiye mwakeza—Mamalelo,
likumbi lyaupahu!

¹⁴⁵ Ikiye ambile ngwenyi, “Mwomwo Ngwayoya, enu mwayoya nawa. Ove wafwelela echi?” Ikiye apwa youmwe zau, lelo, na hayamyaka. Ove wafwelela echi? Ngwafwela Shipilitu Wajila alivene hano jino. Ove wafwelela echi? Ngwafwelela Ikiye mwaya nakutuzalisa etu na Kupwa Chenyi. Ove wafwelela echi? Ngwafwelela nge Shipilitu Wajila natondo kuhingununa Kupwa Chenyi, kuhindula vakakuviza vosena, kulingisa vathu vosena vaze vanahono Shipilitu Wajila kupwa vakuzala. Ove wafwelela echi? Ove wafwelela na muchima wove vosena? Echa twimanenu

namahinji etu na kumuhana Ikiye kwalisa. Ngwafwelela Ikiye mwaholoka hali etu.

¹⁴⁶ Ove Mwata Kalunga, Tengi wa melu na mavu, Mukakuhana Kuyoya cha Hayamyaka, Mukakuhana wana wosena wamwaza, etu “Twafwelela echi,” Mwata. Etu twafwelela nge Ove uli hano mulichino kuliwana. Etu twafwelela nge Ove ukisule myono yethu. Etu twafwelela nge Ove hingununa Shipilitu Yove hali etu. Etu twafwelela nge Ove wapwa youmwe zau, lelo, nahayamyaka. Etu twafwelela Ove wayoya hayamyaka kaha majina etu akusoneka mu Mukanda wa mwana Mukoko wa Kuyoya. Melu osena na mavu nawakaya nakuhita, oloze etu natuya nakuyoya hayamyaka, mwomwo Ove wayoya hayamyaka. Mwata, Ove washikile echi kuli etu. Etu twafwelela echi na muchima wosena. Vyuma vyosena vize vili muli etu, etu twafwelela, Mwata. Ngwamuzanga Ikiye, Ngwamuzanga Ikiye.

¹⁴⁷ Ove wafwelela Ikiye? Ngwafwelela nge Shipilitu Wajila. Kuli Chumachimwe kuholokela hali etu. Ove wafwelela echi? Ngwafwelela Ikiye natondo kuhindula kala muthu hano vene. Ove wafwelela echi? Zundulenu mavoko enu kuli Ikiye. Imanenu hamahinji enu. Enu mwafwelela echi? Ou Shipilitu Wajila alihano. Echi chikiko Chize! Petulu ambile ngwenyi, “Echi chikiko Chize.” Echi chikiko Chize, ou Shipilitu Wajila.

¹⁴⁸ Ove Mwata, Tengi ya melu na mavu, tuma ngolo Jove, kaha kukisula Chove, kaha kuwaha Chove hali vathu, kaha kisula michima yavo, kaha echa vakiko vamone uze Mwana muthu kupwa wakuyoya hayamyaka. Tuhanecho echi, Ove Mwata. Etu twavanehe kuli Ove, mu Lijina Iya Yesu Kulishitu, Mwana Kalunga.

¹⁴⁹ Kala muthu wakuzeneka kupwa na Shipilitu Wajila, zundula mavoko ove na kwalisa Kalunga. Ngwafwelela Ikiye mwaya nakuholokela hali ove. Muthuumwe hakenu mavoko enu hali vakiko. Ino yinapu ola. Mwomwoika etu twatela kuvandamina nakushimbula? Luno lunapu lwola. Luno lunapu lwola Iwa Pendekosita, kukinduluka kuli Kalunga. Oloka na Kalunga, Pendekosita! Echa muchima wove vausunge na ngolo ja Kalunga wakuyoya. Echa Shipilitu Yenye yizenga muli enu kuzalisa myono yenu. Ikiye hano ufuku ha ufuku, hano kuhindula mukakuviza, kuhana kumona kapuputa, chipwe wamunene kaha chindume wangolo chikuma Ikiye eji kwinjikizanga Lyavene kupwa lika youmwe. Haleluya!

¹⁵⁰ Mwalisenu Ikiye. Zundulenu mavoko enu. Vulyama oho ove uli; tachikiza kaha nge ove uli hakamwihi na Ikiye, kaha kuwaha Chenyi, kaha upahu Wenye, kaha ngolo Jenye, kaha keke Yenye yelila haya myaka namyaka. Ikiye apwa youmwe haya mayaka na myaka. Vakisule Lijina Iya Mwata. Haleluya! Mamalelo, alisenu Lijina Lyenyi Iya Jila.

¹⁵¹ Mamalelo, omwo chawaha, omu apwa Ikiye waundume. Vangahi vanatondo kujilika viyoyelo yavo kuli Kalunga hano vene, cheka? Zundula livoko lyove. Vangahi vanatondo kujilika viyoyelo vyavo kuli Kalunga? Mukiko kaha. Zundula mavoko enu. Echa tumone Pendekosita. Echa kutala vathu ja Kalunga. Nanguya nakuzundula livoko lyami. “Mwata, Yami hano. Ngutumenu.” Mbata Kangelo jino na makala akufuma kukamenga na kutuma ngolo Jove hali etu, Mwata. Kalunga, tuhanecho mukuzalilila cha Shipilitu Yove, Ove Tata. Ivwulila kulomba chetu, Ove Mwata. Ivwa kulomba chetu, nge vana vakufwelela vase vanemana. Kwalisa chipwenga ku Lijina Lyenyi.

¹⁵² Mamalelo, nge makimba aupahu kuholoka, mamalelo, mamata alyume akeke. Ove, kwalisa chipwenga kuli Kalunga. Echa myono yetu kuvandamina. Ove wafwelela echi? Ove wafwelela echi? Ou napu Shipilitu Wajila uze eji kwizanga. Eji jinapu ngolo jakuzeneka kumona kutambukisa Wangana wa Kalunga, kukisula cha Pendekosita. Kinduluka kwimbo. Enu muli nakutondeka kwimbo. Enu munapu vathu vamwaza. Kalunga natondo enu kulijilika enu vavene. Mapwevo, litomesenu enu vavene. Malunga, litomesenu enu vavene. Echa tuputukeko kukinduluka kuli Kalunga na kuzachila Kalunga na muchima uvene.

¹⁵³ Mwalisenu Kalunga, Shipilitu Wajila nalovoka nakufuma mukuliwana. Linga kaha ove ocho ove unevwu utwamina. Linga kaha Shipilitu Wajila kutambuka nakwenda. Kuli chuma chimwe Ngunahase kuhanjika. Ngunahono kutachikiza chuma muka nanguhanjika jino. Ou Shipilitu Wajila ali muno mwosena. Vakisule Lijina Iya Mwata. Vamwalise Mwata. Mamalelo, haleluya! Haleluya! Va mwalise Mwata. Va mwalise Mwata. Omwo chawaha, omu chili chaupahu. . . Omu chili chamwaza, omu chili chamwaza kwalisa cha vakakujila ja Kalunga kumeso avo, ha Kupwa cha Shipilitu Wajila hano kutambuka na kutusolwesa etu upahu Wenyi kulovoka muli eli lizavu lyalinene mukujina chimwe, kwalisa Lijina Lyenyi.

¹⁵⁴ Kwalumuka nakulimeka mumavoko na mutuumwe, kuhanjika, “Va mwalise Mwata, ndumbu walunga. Va mwalise Mwata, ndumbu wapwevo.” Echa tupwenga vakwoloka kaha echa Kalunga atusunge. Va mwalise Mwata. Echi chakwoloka. Enu vosena va Mesondisiti, na va Mbaputishiti, na va Pulishiteliyani, va Pendekosita, na va Seventh Day Adventists, na kwosena okwo ove uli, limenekenu mumavoko na umwe namukwavo Kumeso a Mwata Kalunga. Mukiko kaha. Mamalelo, haleluya! Haleluya! Haleluya! Mamalelo, Ngunawahilila Nguli umwe wavo. Ngunawahilila. Mamalelo, kupuzujola jimbango, kumbila vize vyamokomoko. Upahu! Kukasunuka muli Mwata, kumwalisa Lijina Lyenyi. . . Kukisula Lijina Iya Mwata. Mamalelo, haleluya! Va mwalise Kalunga.

155 Mamalelo, Ngwazanga kumona echi: vathu kulimeneka mumavoko umwe na mukwavo kumunyika kumeso avo. Ngolo ja Kalunga kuhanjika, “Mukiko kaha. Mukiko kaha, etu twapwa vana va Kalunga. Etu tuli vosena liuka lyalinene, muthu umwe wamunene muli Yesu Kulishitu, Mwenga Wenyi, Umwe waupahu.” Echi Kwiza cha Mwata chinapanda hakamwihi. Vathu jenyi kwiza hamwe na kulizanga vavene. . . na zangi na ngolo ja Kupwa Chenyi. Mamalelo, echi chinapu nge Melu. Mamalelo, echi chinapu chamwaza. Amena. Mamalelo, omwo chili chaupahu, omu chili chamwaza: kupwa kaha nakulifukula Mwata mu Shipilitu na mu ngolo. Lwola kana. (Chize chapwile kwimana; etu kuputuka.)

156 Kuze kakweshi numba. . . Ngwalwekele vandumbwami, “Vandumbwami, kakweshi chihela chakwimanako.” Kakweshi chihela hano chize. . . Etu katwaputukileko, shikaho etu katwemanako. kupwa kaha—kupwa kaha chamwaza. . . Vangahi vanevu kuwaha? Kupwa Kumeso a Mwata, mamaah, yami, chili chamwaza, kupwa Kumeso a Mwata hano.

157 Jino, Kupwa cha Mwata chili hano kuhindula mukakuviza, kulingisa vathu kupwa kanawa. Mufwelele kaha Ikiye. Ove wafwelela Ikiye? Kachi etu tunahase kufwelela Ikiye, vyuma vyosena vinashiwa. Ove wafwelela ngachize? Ove wafwelela ngachize nge chinapu Kupwa cha Mwata?


158 Jino, shimnu enu. . . Nguhanenu tando yayindende, tando yayindende jino, kaha ivwulila kaha hatando yayindende. Echa ngwinjikize kuli enu napu Shipilitu Wajila hano. Echa ngumilweke nge napu Shipilitu Wajila, Uze vene eji kuhanjikanga, Uze vene eji kulinga chumakana, atachikiza chize. Vangahi hano jino, vezanga hano vakakuviza? Echa tumone mavoko enu. Va vapwanga na kuviza. . . Kuze kuli vathu. . .

159 Kuli lunga nemana kuze. Ove wafwelela, mukulwane? Kakweshi makati akulombelelako, oloze ove wafwelela nge Kalunga nahase kukuhindula ove? Ove wafwelela Ikiye nahase kungulweka ukalu wove? Uli kusali yove. Ove unakuya nakukupula. Echi chakwoloka. Lijina lyove yove Mukulwane. Cartwright. Echi chakwoloka. Echi chakwoloka? Hwingisa livoko lyove. Chosena chakwoloka. Yako kwimbo na kupwa kanawa, ove kaveshi kukakupulako. Ove wafwelela echi?

160 Uze lunga nakwate kemba mumavoko eyi, ove wangufwelela kupwa ngamba ya Kalunga? Ove wafwelela echi kupwa Shipilitu Wajila? Kangwakutachikizako, echi chakwoloka? Kanda lyehi ngukumone muchiyoyelo chami; etu vosena tunapu vangeji. Ove wafwelela Shipilitu Wajila nahase kungulweka ukalu muka uli naou kemba? Akwechi mukule. Echi chakwoloka. Echi keshi chakwolokako? Punduvane. Ove kawafuma munoko. Nduma. Ove ukwechi ukalu wamujimo, ove uli nakuyanda na,

yove lyavene. Echi chakwoloka, keshi ngochoko? Ove wafuma ku Mbongi ya Kansas. Chosena chakwoloka. Kinduluka, Yesu Kulishitu akulingisa ove kupwa kanawa. Haleluya! Ove wafwelela. Ove wafwelela na muchima wove wosena?

¹⁶¹ Hano hali Vangelo ja Mwata, kujinguluka hali ou wamundende—wamundende kanyike wapwevo, oloze wakukula, natwame hano vene, kuya na panga. Ove wafwelela Kalunga mwaya nakukuhindula uze panga, ndumbu wapwevo? Ove, uli na temo yichila hali tepa lyove, zundula livoko lyove. Chosena chakwoloka. Yako kwimbo na kupwa kanawa. Amena. Mamalelo, napu Kalunga; napu Kulishitu Mwana Kalunga. Ikiye asangukile muli vafu. Ikiye ali hano.

¹⁶² Jino, hakenu mavoko enu hali umwe namukwavo kaha lobenu lilombo lya mwaza lya ngonde, enu vosena, shimbu Nguli nakusanyika muthu umwe kwiza kuno. Twaya hano, ndumbu walunga. Shimbu enu mulinamavoko enu hali umwe namukwavo kusolola nge Kalunga mukakuka nawa, Ngukwechi ndumbu walunga hano mwaya na kulomba. (Yako lika, chosena chakwoloka.) Kwalisa chiyenga kuli Mwata Kalunga. 

OVE WAFWELELA ECHI? LVE60-0402

(Believest Thou This?)

Ou Mujimbu kufuma kuli Ndumbu wa lunga William Marrion Branham, vawambulwile hakuputuka mu Ingilishi ha Sateli, Kambambanalisa 2, 1960, ha Municipal Auditorium mu Tulsa, Oklahoma, U.S.A., vanaufumisa mu muzu vakopele ha tepu na kuusoneka mu Ingilishi chakuzeneka kuwalumuna. Echi kwalumuna Lilimi vachinungulwile vausonekele na kuupangila kuli vaka Kukopa cha Lizu Lya Kalunga.

LUVALE

©2021 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Tachikizenu lisesa lyakufwatula

Kulama lisesa lya kufwatula. Ou mukanda vanahase kuufwatula kumakina akuvulisa a hembo kupwa wakuzachisa kuli muthu hakapanji kenya mokomoko kuhana kweka, wa wana wakanyombo, kupwa chitwa chakutanjisa Mujimbu wamwaza wa Yesu Kulishitu. Ou mukanda kavatela kuulanjisako, chipwe kuyitunga yayivulu chikuma, chipwe kuyihaka ha peho ha website, kuyitulika muze vanahase kuyifumisa, kulumbununa mu malimi eka, mokomoko kuuzachisa kupwa jila yakutambwilamo mali chakuzeneka lisesa lya kusoneka kufuma kuli vaka Voice Of God Recordings®.

Mwatondo kutachikiza vyavivulu mokomoko vyuma vikwavo, kaha sonekelenu ku:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org